

### 135. A l'entrada del temps clar

A l'entrada del temps clar, eya  
Per jòia recomençar, eya  
E per jelòs irritar, eya  
Vòl la regina mostrar  
Qu'el'es si amorosa  
A la vi', a la via, jelòs,  
Laissatz nos, laissatz nos  
Balar entre nos, entre nos.

El' a fait pertot mandar, eya  
Non sia jusqu'a la mar, eya  
Piucela ni bachalar, eya  
Que tuit non vengan dançar  
En la dansa joiosa.  
A la vi', ...

Lo reis i ven d'autra part, eya  
Per la dança destorbar, eya  
Que el es en cremetar, eya  
Que òm no li vòlh emblar  
La regin' aurilhosa.  
A la vi', ...

Mais per nient lo vòl far, eya  
Qu'ela n'a sonh de vielhart, eya  
Mais d'un leugièr bachalar, eya  
Qui ben sapcha solaçar  
La dòmna saborosa.  
A la vi' ...

Qui donc la vezés dançar, eya  
E son gent còrs deportar, eya  
Ben pògra dir de vertat, eya  
Qu'el mont non aja sa par  
La regina joiosa.  
A la vi', ...